




ՄԱՅՐ ԱԹՈՌԻ ՄԻԱԲԱՆ, ՄԵԾԻ ՏԱՆՆ ԿԻԼԻԿԻՈ
ՀՈԳԵԼՈՒՅՍ Տ. Տ. ԳԱՐԵԳԻՆ Ա ՀՈՎՍԵԹՅԱՆՑ
ԿԱԹՈՂԻԿՈՍԻ ԾՆՆԴՅԱՆ ՀԱՐՅՈՒՐԱՄՅԱԿԻ ԱՌԻԹՈՎ
ՀԱՆԴԻՍՈՒԹՅՈՒՆ ՀՈԳԵՎՈՐ ԺԵՄԱՐԱՆՈՒՄ

Դեկտեմբերին լրացավ Մայր Աթոռի մեծախառնակ միաբան, մեծանուն գիտնական ու հայրենասեր և հայ մշակույթի անխնայ երախտավոր, Մեծի Տանն Կիլիկիո երջանկահիշատակ Տ. Տ. Գարեգին Ա Հովսեփյանց կաթողիկոսի ծննդյան հարյուրամյակը:

Այս հիշարժան տարեդարձի առիթով Ամենայն Հայոց Վեհափառ Հայրապետի բարեհաճ կարգադրությամբ **դեկտեմբերի 21-ին**՝ հինգշաբթի օրը, ժամը 14-ին, հոգևոր ճեմարանի հանդիսարանում տեղի ունեցավ մեծանուն եկեղեցականի կյանքին ու մատենագրական վաստակին նվիրված հարգանքի հանդիսություն:

Հանդիսության նախագահում էր հոգևոր ճեմարանի տեսուչ հոգ. տ. Ներսես Ծ. վրդ. Պողոսյանը:

Հանդիսության ներկա էին Մայր Աթոռի միաբանությունը, հոգևոր ճեմարանի դասախոսական կազմն ու ուսանողությունը, մայրավանքի պաշտոնությունը և հրավիրյալներ:

Հանդիսությունը բացվում է «Որք զարդարեցին» Թարգմանչաց շարականի երգեցողությամբ, որը կատարում է ճեմարանի երգչախումբը:

Երջանկահիշատակ Տ. Տ. Գարեգին Հովսեփյանց կաթողիկոսի ծննդյան հարյուրամյակին նվիրված հանդիսության ժամանակ հոգևոր ճեմարանի վերակաջու արժանապատիվ տ. Նշան քհն. Բեյլերյանը ներկայացնում է մեծանուն եկեղեցականի կենսագրությունը:

Ճեմարանի երգչախումբը, եկեղեցական երաժշտության դասատու Հայկ Ֆրանջյանի ղեկավարությամբ, կատարում է «Յաղթող գտա», «Նահատակ բարի», «Նախասարկավագ», «Յաղթող և սուրբ հայրապետ», «Ալիք յանցանաց» և «Յամենայն ժամ» շարականները:

Բ լսարանի ուսանող Հովհաննես Գրվրգյանը արտասանում է եղիշե արքեպ. Դուրյանի «Ետևես եկուր» բանաստեղծությունը, իսկ Գ լսարանի ուսանող Հովսեփ սրկ. Հակոբյանը՝ հ. Ղ. Ալիշանի «Հրազդան, գետակդ իմ հայրենի»-ն: Բ լսարանի ուսանող Հակոբ Նալբանդյանը ընթերցում է լուսահոգի Տ. Տ. Գարեգին Ա Վեհի գրվածքներից, բարոյներից քաղված գոհար մտքեր ու խորհրդածություններ:

Այնուհետև մեծանուն եկեղեցականի և բազմախառնակ գիտնականի կյանքի ու գործունեության նվիրված բովանդակալից զեկույցով հանդես է գալիս «Էջմիածին» ամսագրի խմբագրական մարմնի անդամ, պատմական գիտությունների թեկնածու, Մեսրոպ Մաշտոցի անվան Մատենադարանի ավագ գիտական աշխատող Սուրեն Քոնյանցյանը:

Հանդիսության վերջում հոգևոր ճեմարանի տեսուչ հոգ. տ. Ներսես Ծ. վրդ. Պողոսյանը, մի անգամ ևս ոգեկոչելով հիշատակը Մայր Աթոռի մեծանուն միաբանի, հայրենակեր գիտնականի ու մեծ եկեղեցականի, կոչ է անում ուսանողության՝ հավատարիմ մնալ և Էջմիածնի միաբանության, եկեղեցաշեն,

կրթանվեր, մատենագրական այն ավանդություններին, որոնցով փառավորվել է միշտ Մայր Աթոռի պատմությունը ու հարստացել հայ մշակույթի և մեր եկեղեցական արվեստի գանձարանը:

Տ. Տ. Գարեգին Ա Վեհի ծննդյան 100-ամյակին նվիրված հանդիսությունն ավարտվում է խմբովին երգված տերունական աղոթքով:

Դեկտեմբերի 24-ին՝ կիրակի օրը, Մայր տաճարում մատուցվում է հանդիսավոր ս. պատարագ:

Հոգ. տ. Ներսես Ծ. վրդ. Պոգոսյանը քարոզում է «զբարոք պատերազմ պատե-

րագմեցայ, զընթացսն կատարեցի, զհաւատսն պահեցի» (Բ Տիմ. Դ 7) բնաբանով, այն գեղեցկորեն պատշաճեցնելով երանաշնորհ Տ. Գարեգին Վեհի կյանքին և գործունեությանը, նրա ծննդյան հարյուրամյակի առիթով:

«Հայր մեր»-ից առաջ Ամենայն Հայոց Վեհափառ Հայրապետի նախագահությամբ կատարվում է մասնավոր հոգեհանգստյան պաշտոն՝ ի հիշատակ երանաշնորհ Տ. Տ. Գարեգին կաթողիկոս Հովսեփյանցի մահվան տասնհինգերորդ տարելիցի առիթով:

«Յիշատակն արդարոց օրհնութեամբ եղիցին»:

